



16. august 2012

UKA 2012/58

Inatsisartut suleriaasianni § 33 naapertorlugu matumuuna aalajangiiffigisassatut siunnersuut imaattumik saqqummiussissaavut:

Kingusinnerpaamik UPA 2013-imi konto pingaarneq 30.10.45 Meeqqat inuusuttullu immikkut suliniuteqarfigineqarnerat pillugit suliniutit aallartisarneqarsimasut sumut killiffiinnik naliliinertalinnik Naalakkersuisut Inatsisartunut nalunaarusioqqullugit peqquneqarnissaanik Inatsisartut aalajangiiffigisassaattut siunnersuut.

(Inatsisartunut ilaasortat Ruth Heilmann aamma Kristian Jerimiassen, Siumut)

Tunngavilersuut:

Angajoqqaat qitornaminnut oqartussaaneq akisussaanerlu anginerpaaq najummissarpaat, meeqqap atuartaanerani peroriartorneralu tamaat eqqarsaatigalugu taamaappoq taamaattussaavorlu. Meeqqat avatangiissaat ilisimasassanillu sunik tuniorarneqarnerat aamma angajoqqaat akisussaaffiannippoq soorlu aamma meeqqat piginnaatitaaffii ilisimaneqarluassappata aamma meeqqamiiginnarnani angajoqqaaniippoq, soorunalimi. Angajoqqaajusunut ilinniagassat annertoqaat perorsaanermut tunngasut piginnaatitaaffiintut tunngasut.

Angajoqqaat peqataalluaraangata meeqqap siunissaa qaamasoq pilersinneqartarpoq. Qujanartumillu angajoqqaat qitornaminnut pitsaasumik siunissaqartitsiumasut amerlapput aammami nunatsinni meeqqanut asanninneq kikkulluunniit pigisaat angisoorujussuartut ersersinneqartaannarpoq tamannami kalaallit nunatta inuisa qangaaniilli pigaat, tamannalu arlalippassuartigut malunnarlunilu ersarissuvoq kulturitsinnullu naleqartitanut ilaalluinnartutut oqaatigineqartariaqarluni. Ilaqutariit aamma ikioqatigiinneranniittarpoq meeqqanut qanigisanullu asanninneq, tamannalu naleqartitaavoq pingaarutilik, anginermik mikinermilluunniit atortitaasoq, aammalu tamatsinnit ilisimanerussallugu pisariaqarluinnartoq.

Isumaginninnerup tungaatigut ataatsimoortumik akisussaaffeqarnerup nukittorsarnissaanut tamatta kivitseqataasussaavugut, pissusissamisoorippullu suliniutit assigiinngitsut aallartisarneqareersut killiiffi nalilersorneqarnerilu pillugit nalunaarummik tigusaqarnissarput, taamaasilluta suliniutit siunertaminnut naapertuunnersoq imaluunniit allatigut suliniutinik pisariaqartitsisoqassanersoq nalilersorsinnaajumallugu.

Pisortanut aningaasaqarnikkut allaffissornikkullu sunniutissat:

Siunnersuut piviusunnigortinneqassappat Namminersorlutik Oqartussanut allaffissornikkut aningaasartuutinik nassataqassaaq, tassami nalunaarusiaq suliarineqassamat. Ataatsimut isigalugu nalilerneqarpoq AC-itut atorfik ukiup affaanut atorineqassasoq, kr. 250.000,- miss. naleqartoq, nalunaarusiap nutserneqarnissaa il.il. Aningaasartuutissat allaffissornikkut aningaasaliissutip iluani salliunneqartariaqassapput. Tamannalu suliniutinut allanut tulleriissaarinermi kingullinngortit-sisoqarsinnaanera kingunerisinnaavaa.

Inuiaqatigiinnut sunniutissat:

Siunnersuutip inuiaqatigiinnut sunniuteqarnissaa naatsorsuutigineqanngilaq.